



Apeqquteqaat aallaavigalugu Inatsisartut oqallinnissaannik siunnersuut, una pillugu: Nunatta napparsimaviini katsorsaasoqarnikkut maannakkut siunissamilu amerlassutsitigut ikinnerpaaffiliisimanerput qanoq iliorluta naammassineqarnissaa qulakkeersimassavarput.

(Inatsisartunut ilaasortaq Jens-Erik Kirkegaard, Siumut)

Katsorsaanerup siuariartorerata kinguneranik agguaqatigiisillugu ukiut ukumiit ukiumut qaffakkiartorput. Tamanna nuannerpoq tassami asasagut siusinnerusumut naleqqiullugu sivisunerusumik ilagisinnaalernikuugatsigit. Tamanna nuannaarutigisariaqarparput.

Tamannali inuiaqatigiit aqqissuussaanagerat eqqarsaatigalugu angisuunik suliasartaqarpoq. Ikinneruleriartorpugut amerlanerit pilersornissaannut aamma peqqinnissaqarfik tamarmi suliasaqarneruleriartorpoq, utoqqaat nappakulanerusarmata. Taamaattumik siunissami nakorsanik amingaateqaliinnarata aamma peqqissaasunik amingaateqalertussaavugut. Tamanna tunngavigalugu ullumi oqallinnerput manna pingaaruteqarpoq.

Siunnersuuteqartoq ilumoorpoq ullumikkut nunatsinni sumiiffinnut minnernut nakorsassarsiortarnek ajornartorsiutaareeremat. Taava ilanngutissavara aamma peqqissaasussasiorneq imaannaangereeqisoq.

Demokraatini neriuutigaarput ullumimut naleqqiullugu annerusumik nammineq innuttagut iluaqutisinnaajumaarigut. Pisariaqarpoq meeqqat atuarsiata pitsaanerulernissaa aamma amerlanerit peqqissaasunnngorniarnissaminnut nakorsannngorniarnissaminnullu pilerilerilerumaartut. Kisianni isumaqalissanngilagut ajornartorsiummut tamanna aaqiisutissaasoq. Ajornartorsiummut iluarseeqataassaaq. Ukiorpasuarni suli peqqinnissaqarfimmi avataaneersunik sulisoqarnissaq pisariaqartussaavoq sualummik nakorsat eqqarsaatigalugit. Ullumimullu naleqqiullugu artornarneruleriaannaavoq nunani allani aamma aqqissuussaannikkut ajornartorsiuteqartoqarmat. Taamaattumik ajornaatsuinnaangilaq avataaniik sulisussarsiortarnek - maannakkut siunissamiluunniit.

Demokraatini isumaqarpugut pitsaassagaluartoq nakorsanik sulinerminni tuluttut oqaasilinnik tikisitsisalernissaq misissorneqartuuppat. Oqaatsitigut ajornartorsiutinik nassataqassaaq kisianni iluarsisinnaasariaqarparput nunami maani oqaluttaaneq misilittaqarfigilluaratsigu pikkoriffigalugulu. Uangut pingaartutut isigaarput napparsimasut nakorsamit misissorneqarsinnaanissaat eqqortumillu katsorsarneqarsinnaanissaat. Taava naammagiinnartariaqarparput oqalutsip nakorsap oqaasiinik innuttaasumut apuussisarnissaa. Pisuni assigiinngitsuni ullumikkut taamaareerpoq tassami danskisuumiit kalaallisuumut nutserineq atorreqareerpoq.

Nakorsassaaleqinerup ullumimut naleqqiullugu pitsaanerusumik ikorfartorneqarnissaanut periarfissaq alla tassaavoq Internetimi videokkut attaveqaatit atorlugu toqqaannartumik nakorsiarnerup atorreqarsinnaanera. Nakorsap nakorsiartullu isigalutik oqaloqatigiissinnaanerattut pitsaatiginngikkaluarpoq kisianni uangut



isumarput naapertorlugu tamanna pitsaaneruvoq innuttaasup nakorsamit
misissorneqarsinnaangilluinnarneraniit.

Demokraatini oqallilluartoqarumaartoq neriuppugut aamma qilanaarpugut partiit allat isumaasa
tusarnissaannut.